

Երբ կազմեցաւ Վերակազմեալ Հնչակեան Կուսակցութիւնը, Սվազլին եղաւ նրա գործօն ղեկավարներից մէկը, Արփիարեանի, Տամատեանի եւ ուրիշները հետ միասին: Իր քաղաքական ծանօթութեան եւ նախասիրութեան կենտրոնը Կիւրիկիան էր: Սվազլիի զէնքը գլխաւորապէս խօսքն էր եւ գրիչը. գաղափարներ տարածող էր, բայց ոչ գործադրող: Ունի բազմաթիւ յօդւածներ հայերէն, յունարէն, ֆրանսերէն եւ անգլիերէն: Խմբագրել է «Armenian Herald» թերթը Ամերիկայում, եւ եղել է Հայ Աղգային Միութեան նախագահը եւ մասնակցել է աղգային - քաղաքական շատ ձեռնարկներին:

Երբ Վեր. Հնչ. Կուսակցութիւնը ձուլեցաւ Սահմանադիր - Ռամկավար Կուսակցութեան հետ եւ ծնունդ առաւ Ռամկավար - Ազատական Կուսակցութիւնը, Սվազլին դարձաւ այս վերջինիս կարեւոր զէմքերից մէկը, թէեւ ազատ էր ռամկավարների յատուկ թթու մոլեռանդութիւնից: Մտքի որոշ մշակոյթ ունեցող գործիչ էր, բնաւորութեամբ մեղմ, տեսակէտներով ոչ կայուն: Գաղութային իմաստով հայրենասէր էր՝ նման մեր բոլոր այն գործիչներին, որոնք հայրենիքը սիրում են պատկառելի հեռաւորութիւնից:

III

ՅՈՎՍԷՓ ՄԻՐՋԱՅԵԱՆՑ

Յունիս 12-ին, Թեհրանում, յանկարծամահ է եղել իրանահայ յայտնի գործիչ, Իրանի խորհրդարանի պատգամաւոր Յովսէփ Միրզայեանը: Հանգուցեալը ոչ միայն նշանաւոր պետական եւ հայ ազգային գործիչ էր Իրանում, այլեւ աչքի ընկնող գրական զէմք: Նա մէկն էր առաջնակարգ հայ իրանագէտներից, որ տւել է ընտիր թարգմանութիւններ Ֆէրդուսիից, Սայեսմից, Սաադիից եւ այլ դասական հեղինակներից: Միրզայեանցը կարեւոր դեր է խաղացել նաեւ Հ. Յ. Դաշնակցութեան կեանքում, մանաւանդ Կուսակցութեան գործունէութեան առաջին շրջանում: «Վէմ»-ը դեռ առիթ կունենայ խօսելու անհետացող այս ականաւոր մտաւորականի կեանքի եւ գործի մասին:

IV

ՏԻԳՐԱՆ ՄՈՒՇԵՂԵԱՆ

Ապրիլ 23-ին վախճանւել է Երեւանում Պետ. Համալսարանի տեսուչ Տիգրան Մուշեղեանը: Լինելով մէկն այն հայ մտաւորականներից, որոնք հանրային գործունէութեան ասպարէզ են մտել, որպէս Զատագով ու պաշտպան Ժողովրդավար սկզբունքների, հան-